

佛说出生菩提心经

【2012 年修正版】

如是我闻。一时婆伽婆在王舍城迦兰陀竹园。与大比丘众百千人俱。复与无量阿僧祇不可说大菩萨众。所谓十方来集。

尔时王舍大城有婆罗门姓大迦叶。于睡眠中。梦见阎浮提内。有大莲华其华千叶。光明遍照三千大千世界。微妙最胜七宝所成。于莲华内见有月轮。彼月轮内又见丈夫放大光明普照一切。此四天下所有众生见斯光者。生大欢喜踊跃无量皆受快乐。尔时迦叶婆罗门睡觉已。念所梦事心喜生疑。此何因缘竟有何事。于先现此未曾有相。昔所未闻如我梦见。作是念已生大欢喜未曾见有。复作如是念。此有沙门瞿昙。我从他闻六年苦行。降伏魔众证大菩提。转妙法轮摧诸外道。为诸智人之所赞叹。聪明善巧知诸事相。我今应往诣彼沙门瞿昙问此梦相。

尔时迦叶婆罗门。夜既过已。从王舍城往诣迦兰陀竹园往到佛所。到已顶礼佛足却住一面。住一面已。如梦所见而向佛说。时婆罗门具说梦已。尔时世尊告迦叶婆罗门言。汝善男子。有四种善梦得于胜法。何等为四。所谓于睡眠中梦见莲华。或见伞盖。或见月轮。及见佛形。如是见已。应自庆幸我遇胜法。尔时世尊欲重宣此义。而说偈言。

若有睡梦见莲华	及以梦见于伞盖
或复梦里见月轮	应当获得大利益
若有梦见佛形像	诸相具足庄严身
众生见者应欢喜	念当必作调御人

尔时迦叶婆罗门闻此偈已。复白佛言。世尊。何者是大利诸众生等。若为能得此利益求菩提道。尔时佛告迦叶婆罗门言。大利者所谓一切智者是其利也。时迦叶婆罗门复白佛言。世尊。所言一切智利者。有何因缘而可得也。尔时世尊为迦叶婆罗门。而说偈言。

我今说大利	婆罗门善听
若有利和合	当作两足尊
若作转轮王	自在四天下
众生欲作者	须发菩提心
若作梵天王	于众得自在
众生欲作者	须发菩提心
欲界及色界	无色及上界
众生欲作者	须发菩提心
若有众生等	若欲作商主
为商主导师	须发菩提心
若有众生等	欲作大光明
破灭诸黑暗	须发菩提心
若有众生等	欲灭诸颠倒
及以三有等	须发菩提心
若有众生等	欲灭诸盖障
及诸恶法者	须发菩提心
若有众生等	欲灭于无明
及断贪爱网	须发菩提心
若有众生等	欲灭有及爱
及灭垢无垢	须发菩提心

若有众生等	欲灭于我慢
及色使我慢	须发菩提心
若有众生等	欲离于贡高
无病命我慢	须发菩提心
若有众生等	欲灭老我慢
无常常住慢	须发菩提心
若有众生等	欲灭多闻慢
及以持戒慢	须发菩提心
若有众生等	欲灭兰若慢
乞食等诸慢	须发菩提心
若有众生等	欲灭知识慢
爱粪扫衣慢	须发菩提心
若有众生等	欲灭神通慢
一食以为净	须发菩提心
若有众生等	欲灭一切慢
所有有为慢	须发菩提心
若有众生等	当欲供养佛
于先灭度者	须发菩提心
若有众生等	当欲供养佛
所有诸如来	须发菩提心
若有众生等	欲得转法轮
世间无能转	须发菩提心
若有众生等	欲灭应当灭
当思所多思	须发菩提心
若有众生等	当欲行梵行
初中后最上	须发菩提心
若有众生等	欲摄诸精进
往来诸有中	须发菩提心
若有众生等	欲说诸行苦
见众生受苦	须发菩提心
若有众生等	诸法无有我
欲为众生说	须发菩提心
若有众生等	欲转于法轮
欲触上菩提	须发菩提心
若有众生等	欲说寂涅槃
当证胜菩提	须发菩提心
如是等功德	发心者能得
梵志当闻已	应行菩提道

尔时迦叶婆罗门闻此偈已。复白佛言。世尊。发菩提心者应摄几许福聚。尔时世尊即以偈颂向迦叶婆罗门。说如是言。

若此佛刹诸众生	令住信心及持戒
如彼最上大福聚	不及道心十六分
若此佛刹诸众生	令住信心于法行
如彼最上大福聚	不及道心十六分
若诸佛刹恒河沙	皆悉造寺求福故
复造诸塔如须弥	不及道心十六分

若有佛刹如恒沙	皆悉遍施诸七宝
如彼最上大福聚	不及道心十六分
如铁围山高广大	造塔无量为诸佛
如是求福众生等	不及道心十六分
若诸众生具满劫	若头若鬘常担戴
如彼最胜福德聚	不及道心十六分
如是人等得胜法	若求菩提利众生
彼等众生最胜者	此无比类况有上
是故得闻此诸法	智者常生乐法心
当得无边大福聚	速得证于无上道

尔时迦叶婆罗门复白佛言。世尊。如是发菩提心者有退转不。是时佛告迦叶婆罗门言。如是发菩提心者。于解脱中无有退也。但就事别有三种菩提。何等为三。所谓声闻菩提。辟支佛菩提。阿耨多罗三藐三菩提大婆罗门。何者是声闻菩提。若善男子善女人发阿耨多罗三藐三菩提。而不教他发菩提心不令他住。亦不为说如是经典。不自受持亦不为人广说其义。亦有亲近是富伽罗。而不承事供养所须。若有来者及不来者亦不恭敬。而于彼所不生随喜。以此因缘心得解脱。婆罗门。是则名为声闻菩提。复次何者是辟支佛菩提。若善男子善女人自发菩提心。而不教他发菩提心不令他住。亦不为说如是经典。不自受持亦不广为他人解说。亦不亲近如是富伽罗。而不承事供养所须。若有来者及不来者。亦不恭敬亦不随喜。以此因缘心证辟支菩提。是故名为辟支佛道。复次何者是阿耨多罗三藐三菩提。若善男子善女人自发阿耨多罗三藐三菩提心。亦复教他发阿耨多罗三藐三菩提心。既令彼住。复为人说如是经典悉令受持。亲近如是富伽罗等承事供养。若有来者及不来者。亦悉恭敬亦生随喜。如此解脱自利利他。为多人利益故。为多人安乐故。怜愍世间利益安乐诸天天人等故。名阿耨多罗三藐三菩提也。以何义故。名阿耨多罗三藐三菩提。于上更无有胜可求。是故名为阿耨多罗三藐三菩提。尔时世尊欲重宣此义。以偈颂曰。

自发菩提心	不教他受持
因自心力故	于后般涅槃
为自利勤劬	不教他受持
是故名沙门	佛子最胜师
彼发菩提心	教化生欢喜
是故自得道	果报如是知
自成不成他	诸仙中福田
得名为缘觉	婆罗门当知
自发菩提心	复脱多众生
为世作利益	故名佛导师
成就自利益	复令他解脱
此彼无差别	故名不思議

尔时迦叶婆罗门白佛言。世尊。解脱解脱有差别不。佛言。婆罗门。解脱于解脱无有差别。道于道无有差别。乘于乘而有差别。譬如王路有象舆者。有马舆者。有驴舆者。彼等次第行于彼路同至一城。婆罗门。于汝意云何。如是等乘有差别不。婆罗门言。大德世尊。然彼诸乘实有差别。佛言。如是如是。婆罗门。声闻乘。辟支佛乘。阿耨多罗三藐三菩提乘有差别。道与解脱无有差别。婆罗门。譬如恒河有三种人。有从此岸至于彼岸。其初人者。以草为筏倚之而度。第二人者若以皮囊若以皮船倚之而度。第三人者。造作大船乘之入河。于此船中载百千人。其第三人。复敕长子安置守护如此船舫。所有众生来者。汝从此岸度至彼岸。为多人等作利益故。婆罗门。于意云何。夫彼岸者有差别不。婆罗门言。不也世尊。佛复问言。婆罗门。于汝意云何。彼乘之乘有差别不。婆罗门言。所乘之乘实有差别。佛言。如是如是。婆罗门。然声闻乘辟支佛乘阿耨多罗三藐三菩提乘实有差别。婆罗门。如第一人。依倚草筏从于此岸至于彼岸。独一无二。声闻菩提应如是知。第二

人者。若倚皮囊及以皮船。从于此岸度至彼岸。辟支佛菩提应如是知。婆罗门。如第三人。成就大船共多人众。从于此岸至于彼岸。如来菩提应如是知。尔时世尊欲重宣此义。而说偈言。

路及解脱无有上	诸乘皆悉有差别
智者如是应较量	当取最胜最上乘

诸法教如是	正觉说此言
简择诸法已	胜者应当学

尔时迦叶婆罗门复白佛言。世尊。菩萨摩訶萨当云何行云何念住。得至摩訶衍。尔时佛告迦叶婆罗门作如是言。婆罗门汝听是义。若诸菩萨摩訶萨。如念修行至摩訶衍。婆罗门。若善男子善女人。自发菩提心。亦教他人发菩提心。自乐修行劝他令修亦令他住。复为解释如是修多罗义。如是等富伽罗人。不来亲近承受接事。当以四摄而摄取之。何等为四。所谓布施爱语利益同事。尔时世尊欲重宣此义。而说偈言。

种种大布施	一切所有物
欲摄受他故	菩萨无畏者
示现引接道	众生不依来
能以妙善语	数数当安慰
为自他安乐	彼所生善处
昼夜常随顺	如是众生等
不信教令信	破戒令住戒
慳吝令布施	一切巧利益
教人行菩提	牢固常精进
同于利益事	智者如教行
如此智慧者	菩萨之导师
智慧所行者	常乐大乘法
勇猛是最胜	智者应当学
以彼胜法故	最胜到彼岸

尔时迦叶婆罗门。复以偈颂而白佛言。

大德示彼行	菩萨诸导师
当学彼所行	得至两足尊
为我说彼行	及行行所依
菩提深广大	慈愍愿为说

尔时世尊告迦叶婆罗门言。善哉婆罗门。诸菩萨有三种行。何等为三。所谓天行梵行圣行。婆罗门。于中何者名为天行。若有善男子善女人。以慈身业。以慈意业。以慈口业。遍满东方无量世界慈行充满。行此遍已。复能善入南西北方四维上下。皆以慈身业慈意业慈口业普遍充满。是名天行。于中何者名为梵行。所谓四无量。何等为四。慈悲喜舍。是名梵行。婆罗门。于中何者名为圣行。所谓三解脱门。何者为三。空无相无愿。是名圣行。尔时世尊欲重宣此义。而说偈言。

勇猛行精进	菩萨之导师
若有具天行	是人乐菩提
圣行及梵行	是行圣所说
若有修行者	是人得不动

尔时迦叶婆罗门。复以此偈。而白佛言。

我乐深菩提	今问大导师
此等当来世	如何集诸行
为后众生等	故我问世尊
于佛菩提中	我意无分别
令我发道心	利益众生故

尔时世尊。复以偈颂报彼迦叶婆罗门言。

说此修多罗	令发大菩提
梵志佛菩提	未曾有分别
说此修多罗	令发大菩提
能断一切疑	随顺众生问
说此修多罗	令发大菩提
能断一切疑	称彼众生欲
得闻此经者	彼于未来世
能行大布施	至于檀彼岸
得闻此经者	彼于未来世
护持戒无缺	至于戒彼岸
得闻此经者	彼于未来世
行忍为众生	至于忍彼岸
得闻此经者	彼于未来世
精进为众生	至于精进岸
得闻此经者	彼于未来世
常入诸禅定	至于禅彼岸
得闻此经者	彼于未来世
为众求胜智	至于智彼岸
已曾作供养	怜愍众生者
得闻此经典	后世到其手
比丘住兰若	意欲佛菩提
得闻此经者	于后最先得
过去数亿佛	已持此经典
为利诸菩萨	发起意欲故
若有婆罗门	欲乐佛菩提
彼时得信已	是经至其手
我见彼众生	悉知彼所行
亦知彼名字	我见悉无碍
一切颇具说	恐迷未来人
惧彼起诸过	是故少分说

尔时迦叶婆罗门。复以此偈而白佛言。

大德此善持	令生广大意
此世大丈夫	不久我当作
过去及未来	导师之所说
为彼生善利	故住于菩提

尔时世尊。复以偈报婆罗门言。

彼等住此智	为谁之所说
已知彼心行	我今当记彼
所闻此经者	今现在我前
彼等于后世	此经当现前
若有诸女人	抄写此经典
此经当在手	能生大菩提
我于先已说	比丘乐兰若
手得此经典	于后当现前
比丘闻此经	悲泣而雨泪
我先作何业	今世得此利
我于如是经	未曾善思惟
我已得受记	何业获此果
我昔婆罗门	依于比丘活
时比丘放逸	说此修多罗
梵志于彼闻	时至而乞食
泣泪已行出	是时心作愿
我于修多罗	钞义及文字
后世作证明	亦复作拥护
以彼善业果	于后后末世
得此修多罗	执持在其手
彼时有比丘	悲泣泪满目
当时作忏悔	后得此经法
于先业灭尽	彼时有相现
于其睡梦中	得此修多罗
生死诸流转	欺诳大恐怖
斯由阿弥陀	愿力如是果
破戒诸比丘	为他所轻贱
如是多诸过	流转大恐怖
如是多诸恶	由得闻此经
当至彼边际	于后常显曜

尔时迦叶婆罗门。复以此偈而白佛言。

此大修多罗	令发大道心
为我及未来	分别广宣说

尔时世尊。复以偈告迦叶种姓婆罗门言。

未来诸音声	乃至我所说
此是广经典	是故汝当知
说此大经典	此当作阿含
当作秘密藏	声闻所修学
此处之所说	及余得道者
此是诸经母	梵志如此知
彼时诸比丘	于我灭度后
杂及长阿含	复名中阿含

彼时有阿含	具数名增一
复说杂经典	篋藏声闻说
复当作毗尼	亦作阿毗昙
或于三篋藏	得名诸比丘
八万有四千	法聚我已说
一切从此出	名为最胜经
于此说声闻	及说独一觉
诸智之根本	不思議经典
世间之所有	三界未现者
诸福之根本	由发菩提心
施戒等功德	忍辱精进行
禅定胜功德	此经中善说
智慧胜功德	解脱忍寂灭
一切皆示现	此经中善说
苦集及以道	寂灭于此现
诸法皆佛法	此经之所说
说诸苦无常	亦说无我法
说寂静涅槃	在此修多罗
此处说声闻	所住诸因缘
大乘此经典	摄受一切法
诸法甚广大	在于菩提心
此为最胜典	普说修多罗
现前见诸佛	及为彼说法
当时现前闻	斯由此经典
三界诸众生	少有闻此经
闻已生爱乐	为求佛乘故

尔时迦叶婆罗门复白佛言。希有世尊。若诸众生无有智慧。若闻如是无上无边。乃至如是等众生当无有智慧。若如是等无边无上修多罗。闻已不能于此法中不生坚固乐欲。大德世尊有何因缘既有如是妙法。然彼众生而当虚过也。

尔时佛告彼婆罗门言。此三千大千世界。有百俱致(凡言俱致者隋数千万)诸魔宫殿。彼一一魔有俱致数魔众眷属。围绕彼诸魔辈。常勤方便欲灭此经作种种因缘。因彼因缘随所在处作诸障碍。所以者何。若以三千大千世界所有众生。皆悉得于阿罗汉果。若有善男子善女人。闻此修多罗已。当发阿耨多罗三藐三菩提心。婆罗门。以是因缘。令俱致数诸魔。勤求方便欲灭此经。所以者何。婆罗门。此修多罗。是一切诸法种性根本。以是义故。俱致诸魔勤求方便欲灭此经。尔时佛告婆罗门。今有修多罗。名曰破魔众会。汝等受持读诵。即得破彼魔天众会。婆罗门。譬如日轮既出现时。能灭一切幽冥黑暗如是如是。婆罗门说破魔众会修多罗时。一切诸魔隐没不现。婆罗门。何者名为破魔众会修多罗。尔时世尊。即说陀罗尼曰。

破魔众会修多罗陀罗尼

tadyathā, anu-bodhana bodhi-cittā samādāpanatā,
 达滴呀_(合)他_(引)阿奴-啞_(布剖反)它拿啞_(布剖反)提-积达_(引)萨吗_(引)达_(引)巴拿达_(引)
 vrata vi-vṛddha, tatra buddha nir-gama prabhottama
 乌喇_(合、弹)达微-乌哩_(合、弹)它达得喇_(合、弹)布塔尼勒-嘎吗波喇_(合、弹)剖达吗
 pāta hi māra-bhavanāni mahā pra-cale, sarva
 巴_(引)达嘿_(嘿衣反)吗_(引)喇_(弹)-帕哇拿_(引)尼吗哈_(引)波喇_(合、弹)-加雷萨勒哇

吗_(引)喇_(弹)-塞尼呀_(合) 嘿_(嘿衣反)哩_(弹) 旁嘎 微-达_(引)喇_(弹) 吗_(引)喇_(弹)-积诃吗_(合)
ati-bala eka-kṣaṇa layo svāhā.

[illegible]

魔勤于此经
是故此经典
令魔悉迷乱
相视不能言
恐怖众生故
颠倒而堕落
慈悲和合者
平等说法时
降伏诸魔王
夜叉诸鬼等
彼力杖不害
言说咒诅毒
逼身及逼心
常当所作誓
闭塞诸恶道
诸魔悉摧灭
一切法巧智
须闻此经典
若能学此经
最上觉菩提

当欲坏灭之
调御今为说
从聚坐战栗
此恶行果报
常怀作恶心
是故得现报
喜心有所说
恶心意悉散
及散魔军众
自然皆堕落
水火不漂然
不能有伤害
彼等不曾有
身口如是住
远离一切难
为说此经故
若欲度彼岸
闻已即能学
无畏诸菩萨
是向菩提句

备注：经书中记载的陀罗尼，是用唐朝官方语言河洛话(今闽南语)或其他语言翻译的，而我们现在的官方语言是普通话，如果用普通话去念他们当时翻译的咒语，就会显得不准确。再者《大藏经》上部分咒语也有纰漏，这就会使我们用现代汉语去念古代的咒语收效甚微或毫无感应。因为咒语是诸佛菩萨之秘，更准确的读音能够快速感

通佛菩萨，所以请用普通话念诵黑色大字部分内容，此部分为更正后真言的梵音近似读音，其中(引)代表之前的一个字念长音，(合)代表之前的带下划线的汉字组合拼音，(弹)代表之前的一个字念弹舌音，(卷)代表之前的一个字念卷舌音，(布剖反)代表之前的一个字的读音取布的声母 b，剖的韵母 ou，组合拼音念 bou，(黑衣反)代表之前的一个字的读音取黑的声母 h，衣的韵母 i，组合拼音念 hi。(阁衣反)代表之前的一个字的读音取阁的声母 g，衣的韵母 i，组合拼音念 gi。其他标注了(反)型字的均为之前的一个字的读音取括号内第一个字的声母和第二个字的韵母组合拼音。(半)代表之前一个字只用念读音的一半。

蔡文端居士罗马梵文网：<https://dharanipitaka.com/>

蔡文端居士梵汉转译网：<http://www.caiwenduan.com/>